

NWER NYI POL NYONO TV TAITUS

¹ Me Pol wo, ji li nlokeltum Esowo, a ntiingetib no Jisos Kraist. Esowo tum-m re me n song kak ane ba á ma yehke bo ebo go bo eltaame, fere tib bo elkahne ni etingitingi ni kpo jen a eljolo

Esowo Esowo.*

² N kp'limi eltum nia, tib eji n kp'kunu ekpu re, bo bahke bele elkpín ni li go njinanjini, ni Esowo bi kil jo kim efahnge nyame no tong-r go mboma mbomo, njini kehm jolo.

³ Go ngare nyi nno wo á lennge elkpín nio go ege alum,† nya á yake no kak-m go ebo. Owo wahnge n kp'tiingi etib ebame, tib eji Esowo nt'tahre ewahre tong-m no.‡

⁴ N kp'nyono nwer nyia tv Taitus ji li etingitingi mmon ewame, ye ji e kpi eltaame na anehng.§

Nong, Esowo Nsoo, a Kraist Jisos nt'tahre ewahre ka-a nnoobo, a elkoono.

Nne no fuumu re á jol nnenkul ero

⁵ Jia ji wahnge n tahm-a sa go Krit, eji a l'tuungu nsol nyi kpeke li go ellimi, fere yehke anebkul ero go ejahbe ajehng ajehng ana n tong-a no.

⁶ Nnenkul ero bahke jolo nne no ki kpi egahme ajehng ajehng.* Á bahke bele nkal awohng. Abon ebe bahke jolo ane ba ma taame tv Esowo, ba ane

* **1:1 1:1** Jems 3:13-17 † **1:3 1:3** Ef 1:9-12 ‡ **1:3 1:3** Elt 26:16-18

§ **1:4 1:4** 1 Tim 1:2 * **1:6 1:6** 1 Tim 3:1-7

l'k'jo ka bo ebi re, bo kp'lehke elwur. Bo nehm jol ane ba l'k'jo wuk babnde.

⁷ Tibre ntubesi ero bahke jolo nne no ki kpi egahme ajehng ajehng, eji á li nne no Esowo ma yake eltum ene kak-e go ebo. Á nehm jol nne no kpo lim agabbe, fere jo rak eltim sohk sohk, jo wo amahm, jo nok abohng, fere jol nne no nsol kil jo gbal-e.

⁸ Á bahke jolo nne no kpo vvrv ajenne. Ejum ajehng ajehng ji nno bahk-e jo k'kor. Á bahke bele ntir atahng nyi nno, fere jol go etingitingi, fere bel nnoobo eljini, fere jol nne no bahke jo mal bob elne.

⁹ Á bahke yiimi t'tahne go atingitingi alum nya bo tib-e no, eji á l'jo mal rehke ane, fere jo tib etingitingi mbang,[†] fere jo bung, ga ane ba kpo ten mbang nyio.[‡]

Erehke ji li bade anehm ane

¹⁰ Tibre ane gbalee baa, asehgesehng ane ba ma yehke nrur, ba kil jo wuk Esowo, bo jio ji kpo bung na bung fad, fere jo nehm ane. §

¹¹ M bahke sahde bo anyo. Bo ba kpo kpiidi alaaga ane akpade go ero, tib eji bo kp'tibi nsol nyi kehn bo jol k'tib. Bo kpo lim ano, eji bo l'bel abi akpohko.*

¹² Nne a Krit no jolo nnyehnamahr abo wo bungu antahng antahng re, “Aneb Krit kpo kiimi afahng ngare anyehng anyehng. Bo abi enyam bi. Bo abalehke ebno ba ma gbo ewon ba.”

[†] 1:9 1:9 2 Tim 2:24 [‡] 1:9 1:9 Elt 6:10 § 1:10 1:10 Elt 15:1,24;

1 Tim 1:3-8 * 1:11 1:11 2 Pit 2:1-3

¹³ Enyehnamahr jia lohko li go etingitingi. Esi jia ji wahnge a bahke jo nyam bo t'tahne, eji elkpin ebo l'jol ni nno,

¹⁴ eji bo l'k'kpe wuungu Jus atung go bo amongo, a atahm nya ane jehke no, bao ba ma ten etingitingi.[†]

¹⁵ Ane ba li saang, ejum ajehng ajehng li bo saang. Wo, ejang bi ane ba ki li saang, ba kil taame, ejum ajehng ajehng limm, ji li bo saang. Ntir atahng ebo, a ntim ebo limm saang.[‡]

¹⁶ Bo kpo bung go bo a nnyo re, bo nyi Esowo. Go bo eljini ni bo kpo tib, bo kpo ten-e ten. Bo li ana ejum nkuk go esamahr bi Esowo. Bo kpehme wuk-e. Bo fuumem go eltum ni nno anehng anehng.

2

Eljini ni aneb ero

¹ Wo Taitus, jo tib nsol nyi fuumu a eltibi ni nno!*

² Tong anebkul ba li aneblum re bo jo lim ejum ajehng ajehng biingi biingi, amahr ebo jo jol sange sange, bo fere jo bob elbo. Nong, bo bel ekakesehk ji nno, a elkoro ni nno, a elkpuumu ni nno.

³ Ano wo fvfo a bahke tob tong anebkal ba li anebkul re bo jo lim eljini ni ane ba li ebo ebo. Nong, bo k'jo jol ane ba kpo kiimi afahnge lake ane bako. Bo k'jo jol aju ka amahm gbalee. Nobo re bo jo tib ji kp'nobo,

[†] 1:14 1:14 Mak 7:8 [‡] 1:15 1:15 1 Tim 4:3-5 * 2:1 2:1 2 Tim 1:13

⁴ fere jo ka agbahme elle re, alum ebo jo kor bo, a abon ebo fvfo,

⁵ fere jo tib bo, ana bo bahke jo bob elbo, fere jo jol saang, jo kuuru alaaga ebo, fere bel nnoobo eljini, fere jo woomo alum ebo go elwo,[†] eji nne awohng awohng l'k'jo bung ebi bade alum Esowo.

⁶ Mbang ny'nehm nyi a bahke tob jo rehke ajangkun re bo jo bob elbo.

⁷ Wofono antahng jol ano ona go ejum ajehng ajehng, eji ane l'leeme nnoobo nyi a kp'limi.[‡] A l'kehm tibi, ka jo be esamahr ane. Jo tib go mbang nyi ane bahke lohko kahn re, etib eba li etahntahn etib.

⁸ Jo bung alum nya nno, nya bo l'k'ma jo faabe, eji l'riki nne no wob njahm nyehko ndon, á k'kpe ma bung eb'bi ajehng ajehng bada nahre.[§]

⁹ Tong alokeltum re bo woomo babnde ebo go elwo, fere jo lim ejum ajehng ajehng ji bahke jo kor babnde ebo.* Bo k'jo faange bo go nnyo,

¹⁰ bo k'jo v bo ejv. Ga nob re bo jo tib eljini ni ane ba li go etingitingi, ba kpo kuuru nsol nyi babnde ebo nob nob, eji eltibi ni Esowo nt'tahre ewahre l'bel nnooba mbing tib go ejum ajehng ajehng ji bo kp'limi.

Ana nnoobo nyi Esowo ma lohng ba

¹¹ Tibre nnoobo nyi Esowo eblohng ba re ba tahre ane kpee,[†]

¹² fere tib-r re, wahr yake eljini ni kil jo kor Esowo, a ekor nsol njini nyia, wahr fere jo jol

[†] 2:5 2:5 Ef 5:22-25 [‡] 2:7 2:7 1 Tim 4:12; 1 Pit 5:3 [§] 2:8 2:8 Ell
12:10 * 2:9 2:9 1 Pit 2:18 [†] 2:11 2:11 1 Tim 2:4

amahr sange sange, fere jo bel etingitingi elkpín,
tob jo lim nsol nyi kpo kor Esowo go njini nyia,‡

13 eji e kp'siki efung bi Esowo ma fuulu, bi e
kp'kunu ekpu, bi ellub ni egburu Esowo ebahre,
a Jisos Kraist nt'tahre bahke lohngo ba,§

14 ye ji yake elne ka tib go egahre esi, eji á l'fak-r
yake go ab'bi kpee, fere lim-r, e jol ane ba li saang
ka-e, fere jo kak ekpuku go nnoobo alimi.

15 Jo tib nsol nyia, wo jo rehke ane, fere jo nyam
bo go nsahm nyi n ka-a no.* Nong, nne awohng
awohng ki-a jo daange!†

3

Ji fuumu re aneb ero jo lim

1 Jo buumu bo re, bo jo woomo atul, a atubesi
go elwo, fere jo wuk bo.* Nobo re, jo kor bo, bo
jo lim ejum ajehng ajehng ji kp'nobo.

2 Tong bo re bo k'jo bung ebi bada nne awohng
awohng, fere jo taange ntaange. Nobo re bo bel
nnaange eljini, fere jo bum nne awohng awohng
ana egburu nne.

3 Tibre wahrfono antahng wuku wuku e jolo
agboolo, e joom wuk nyi etung, e t'tan mbang.
E jolo aju ka ajoobo nsol gbalee nya jo mell-r go
egahra ntim, fere jol aju ka elyebe ni njini. Elkpín
enahre kpee jolo ab'bi ab'bi, a ala ateele. Ane jo
ko-r ekv, wahr tob jo ko bo ekv.

4 Ngare nyi nnoobo nyi Esowo, a elkoro ni
Esowo nt'tahre ewahre lohngo no ba,†

‡ 2:12 2:12 Jems 2:7 § 2:13 2:13 Fil 3:20-21 * 2:15 2:15 Tait

1:5 † 2:15 2:15 1 Tim 4:12 * 3:1 3:1 Rom 13:1-8; 1 Pit 2:13-17

† 3:4 3:4 Tait 2:11

⁵ á ba tahr-r na. Wahr á tahrem tib eji e ma lim nsol nyi li go etingitingi. Á tahr-r tib go ege a ndon,‡ eji á ru-r no go Etingi Etohko, e ma fere tuungu jini,§ fere jol anebe nfenfe.

⁶ Tibre Esowo ebyaange Etingi Etohko gbalee wohng-r, ji sehng go abo nya Jisos Kraist nt'tahre ewahre,

⁷ eji e l'li eno go esamahr bi Esowo tib go ege a nnoobo, fere li elkv ni li elkpin ni li go njinanjini ni e kp'kunu ekpu.

⁸ Alum nyaa li go etingitingi. N kp'sebe re, wo yiimi t'tahne go nsol nyia, eji ane ba ma taame tv Esowo l'jo kunu ekpu, jo rod ngare abo, jo lim nnoobo. Nsol nyia kp'nobo, kpi nsehng nyi bahke kake ane.

⁹ Ka jo yel ellong ane ba kpo lim egboolo nfaabe, fere jo bung, lung abing nya babnso ejahre nya nya, fere jo taange ntaange, fere jo nok atemtem go alum nnyo bade atahm. Nsol nyia, nsehng anyehng anyehng kpimm, li mbol mbol.

¹⁰ Nne no kpo wahng re ane yab, rehk-e nkpel anyehng, nkpel nyehko. Á tohko wuk, yab a ne.*

¹¹ Tibre a kp'kahne re, elkohn nne noo ebran-nge. Á kp'limi abiafem. Yebkimi ebi ka elne antahng.

Es'kohro erehke

¹² N l'tum Artemas, afi jolo Tikikus tv-a, nok, eji a l'lub ba kpir-m go Nikopolis. Tibre me n tir re, m bahke kange o elum kohro kohro.

‡ 3:5 3:5 Ef 2:8-9 § 3:5 3:5 Jon 3:5 * 3:10 3:10 Mat 18:15-17

¹³ Lub nok, wo kak Senas ji li eloya ebo, a Apollos, eji ejum ajehng ajehng l'k'rin bo go bo eljen.

¹⁴ Nong, ane ebahre kpili ana bo bahke jo yake ngare ebo, kak go nnoobo eltum ni fuumu ellimi, a ni lubu lub, eji bo l'k'jol na jol, k'kab akab.[†]

¹⁵ Ane kpee ba li a name kp-a kake nnyo. Kak ane ba e kpi bo kor go ejang bi Esowo nnyo. Nong, nnoobo nyi Esowo jol a nahne wahn ane kpee.

[†] **3:14 3:14** Kol 4:5

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4